



Interno informativno glasilo Medžlisa IZ-e Tešanj

KURBAN BAJRAM 2022. g. /1443. h. g. (prvi dan Bajrama bio je u subotu, 09.07.2022.) (str.4.)



Centar Duje, 09.07.2022. - Predaja kurbanskog mesa iz Tešnja



Raduša – 10.07.2022. Preuzimanje kurbanskih kožica

NOVA 1444. h. g. (1. muharrem 1444. h. g. bio u subotu 30. 07. 2022.) (str. 5.)



Miljanovci, 30.07.2022. g. (01.01.1444.h.g.).
Tradicionalni mevlud, centralna manifestacija Medžlisa



Medžlis, 28.07.2022. – Početak obilježavanja Nove 1444.h.g.
promocijom knjige "Putem svile"

MANIFESTACIJE-JUBILEJI (str. 6.)



Dobropolje-Mekiš – 17.07.2022.
Mevlud – obilježen jubilej 30 godina džemata.



Džemilić Planje, 14.08.2022.
Tradicionalni mevlud i hatma dova za šehide,
kojim je obilježen i jubilej 50 godina džamije

IZBORI U IZ-i 2022. – pravo da biraju imaju svi članovi koji su naponili 18. godina i uplatili članarinu

RIJEČ UREDNIKA

BISMIL-LAHIR-RAHMANIR-RAHIM**Poštovani čitaoci!**

Pred nama su mubarek dani mjeseca rebiu-l-evvela 1444.h.g. Mjeseca u kome je rođen Muhammed a.s. Sjećanje na njegovo rođenje, život, put i njegovo djelo nije vraćanje u prošlost već razumijevanje sadašnjosti.

Naša obaveza jeste da stalno bdijemo nad svojom vjerom.

Vjera od nas traži da se fokusiramo na ono što će nas ujediniti u našem vjerovanju i našem djelovanju.

Naše djelovanje na ovom prolaznom svijetu jeste mjera našeg razumijevanja vjere s kojom smo došli na ovaj prolazni svijet i s kojom želimo da odemo sa ovog prolaznog svijeta.

U tom razumijevanju vjere i našeg djelovanja kao djeca, roditelji, staratelji, treba da znamo da važnu ulogu ima mektebska pouka, kao i nastava u školi.

Pitanje mektepske pouke nije pitanje samo pojedinca, muallima, roditelja, ili djeteta, već je to pitanje zajednice kao nešto što je zajedničko dobro, i to zajedničko dobro ostavlja trag baš kao što su ostavile trag i generacije djece i roditelja prija nas.

Obzirom da smo na početku mektepske i školske godine ovo je prilika da nas podsjetim na važnost i značaj prvog Kur'anskog imperativa „Ikre“ u kreiranju naše mladosti.

Pomoću znanja pružena nam je prilika da razlikujemo doro od lošeg, zla.

Naši pobožni učitelji složni su u tome da je uzrok gubljenja vjere kod ljudi u stvari uzrok činjenja grijeha i prelaženja granica koje je Allah dž.š. postavio kao branu ispred nas za naše dobro.

Molim Allaha dž.š. da nas zaštiti od zla, i da nam podari Svoju milost i blagodat, a našim mektebljama, učenicima, muallimima i učiteljima hairli početak nove kalendarske mektebske i školske godine.

Aktivnosti IO Medžlisa :

23. 08. 2022. - Održana 30. redovna sjednica IO Mežlisa IZ-e Tešanj. Sjednicom je predsjedavao predsjednik Zehrudin Kruško. Na sjednici je razmatran dnevni red od 14 tačaka i usvojeni: Zapisnik sa 28. i 29. sjednice IO, Izvještaj o mektepskoj pouci za mektepsku 2021/22 - 1442/1443. godinu, Izvještaj o Islamskoj vjeronauci u školama za školsku 2021/22 - 1442/1443. godinu, Izvještaj o realizaciji plana aktivnosti u povodu Kurban-bajrama 2022-1443.h.g., Izvještaj o realizaciji plana aktivnosti u povodu Hidžre - Nove 1444.h.g., Plan aktivnosti u povodu početka nove 2022/23 – 1444/45 mektepske godine, Odluka o imenovanju Izborne komisije Medžlisa IZ-e Tešanj za provođenje izbora u Isamskoj zajednici 2022.godine, Prijedlog izmjena i dopuna Pravilnika o organizaciji dženaze, upotrebi, održavanju i čivanju mezarja na području Medžlisa IZ-e Tešanj, Prijedlog usklađivanja normativnih akata Medžlisa IZ-e Tešanj sa Odlukom Muftijstva zeničkog, Prijedlozi zaključaka Komisije za vakuf i vakufsko zemljište, Molba Muris-ef. Bračkana imam džemata Mračaj-Potočani za neplaćeno odsustvo, Informacija Disciplinske komisije po prijavi džematskog odbora džemata Dobropolje-Mekiš, Odluka o gradnji šadrvana u haremu mesdžida Roše, Molba Mirnes-ef. Alića imama džemata Vukovo za sporazumni prekid radnog odnosa.

**POZIV NA SARADNJU**

Esselamu alejkum, poštovani čitatelji!

Pred vama je novi broj Biltena Medžlisa IZ-e Tešanj. Ovo je još jedan naš pokušaj da damo skroman doprinos u prezentaciji našeg rada i aktivnosti i da ga približimo vama.

Javite nam se sa vašim primjedbama i sugestijama kako bismo zajednički što bolje prezentovali naš Medžlis

Naša web stranica: www.miztesanj.ba ; email: info@miztesanj.ba

Bilten Medžlisa IZ-e Tešanj

Izdavač: Medžlis IZ-e Tešanj, za izdavača Zehrudin Kruško.

Glavni i odgovorni urednik: mr. Fuad ef. Omerbašić; tehnički urednik, tekst i foto Rašid Orlović.

Redakcija: Dževad ef. Hasanbašić; mr. Enver ef. Kurtić, hafiz mr. Almir ef. Hadžić i Suljo ef. Djedović prof., saradnici imami MIZ-e Tešanj.

Iz hutbe reisu-l-uleme dr. Husein-ef. Kavazovića u povodu početka nove školske i mektepske godine

U ime Allaha, Milostivog, Samilosnog.

Hvala Allahu, Gospodaru svjetova i Vladaru dana sudnjeg. Koji znanjem i mudrošću daruje koga hoće, a ostavlja u zabuni koga hoće. Neka Njegov mir i spas budu nad Muhammedom poslanikom i svim njegovim sljedbenicima, u svim, pa i u ovom našem, vremenu.

U danima kada u novi ciklus obrazovanja naši mladi ponosno i gordo kreću, svjesniji smo važnosti sticanja znanja i naše potrebe da im pružimo što bolje uvjete i što bolje ih podstaknemo da hrabro uplove u okeane saznavanja i naučavanja. Znanje je velika blagodat, nimet, koji nam je Allah podario. Naglasimo i nikada nemojmo zaboraviti, ili, ne daj Bože, stiditi se našega pripadanja svjetskoj kulturi, koja počiva na velikom i najvažnijem imperativu: *Uči!, u ime svoga Gospodara!* Inspirirani tom jednostavnom zapovijedi, muslimani su utemeljili veličanstvenu kulturu, nošeni elanom i visokim stremljenjima. Ta kultura će osloboditi ljudski um, srce i dušu i čovjeka izvesti na put milosti, humanosti i istinskih vrijednosti. Islam je sebi privukao milione ljudi ondašnjeg čovječanstva, a danas skoro dvije milijarde ljudi nastavlja njihovim stazama.

A na nama je, kao i na njima, obaveza ostvarivanja makar uvida u znanja o njegovom učenju i svakodnevnim obavezama koje iz njega proizlaze, te pretakanju toga znanja u moralno postupanje, krijepost i požrtvovanost u promoviranju i činjenju dobra. Ona je stalna, kako prije, tako i danas, i tako u budućnosti. Onako kako su je naši preci razumijevali, razumijevamo je i mi danas, podižući obrazovni sistem od mekteba, škola i obdaništa, do fakulteta i instituta, u kojima na mlađe generacije prenosimo Božiju blagodat znanja. Jer, o svemu što izvršava musliman mora imati znanje. To je njegova obaveza i na nju se misli u hadisu: *Tražiti znanje je stroga obaveza svakog muslimana!*

Sva znanja su važna. Kur'an podstiče na njih, kao što podstiče i muslimane da ih usvajaju i prenose na sljedeće generacije. Ima li veličanstvenijeg podsticaja od kur'anskih riječi: *A Allah će na visoke stepene uzdignuti one među vama koji vjeruju i kojima je dato znanje. A Allah dobro zna ono što radite.* (El-Mudžadele, 11.)

Na krilima vjere, u ranoj muslimanskoj zajednici je nastupila velika i sveobuhvatna naučna aktivnost. Među vjernicima je vladala neutoljiva glad za novim spoznajama. Učeni ljudi uživali su društveni ugled, bili cijenjeni i poštovani, a njihova riječ se prenosila kao nešto najdragocjenije. „Učeni ljudi su nasljednici vjerovjesnika!“, odzvanjale su riječi Muhammeda, a.s., i u srcima njegovih sljedbenika raspirivale ljubav prema tim ljudima.

Prema učenjacima su se okretale i upućivale mase ljudi, naročito mladih. Bili su uzori u svakodnevnom ponašanju i vodili su računa o svakoj sitnici. Budući da su bdjeli nad okolnostima života i vodili računa o ekonomskom i duhovnom stanju ljudi, svojim autoritetom su utjecali na državne strukture i one su morale pokazivati odgovornost prema obavezama koje su preuzele – morale su suzbijati zlo, zastupati pravdu i snažno biti angažirane na radu za dobrobit ljudi, ali i općeg životnog ambijenta.

Tako je kada učenjaci vrše svoju ulogu i kad se država rukovodi onim što joj kažu ljudi od znanja. Tada se blagodati rasprostiru posvuda, i osjete ih i životinje, ne samo ljudi. Poslanik, a.s., rekao je: „Doista, Allah, Njegovi meleki i stanovnici nebesa i Zemlje, čak i mrav u svom leglu, i riba, blagosiljaju onoga ko ljude podučava dobru!“ (Et-Tirmizi)

U našoj tradiciji se pod izrazom *alim* primarno podrazumijeva poznavalac Kur'ana i suneta, poznavalac Božijih naredbi i zabrana, ali i intencija vjere i ciljeva koje ona nastoji ostvariti. Osnova je, dakle, poznavanje dobrog i lošeg i svijest o rezultatima, odnosno posljedicama jednog i drugog, te umijeće izvođenja pravilnog zaključka i usvajanja pravilne odluke.

Da bi se ta odgovorna zadaća mogla vršiti na prikladan način, svakako je potrebno znanje, poznavanje onoga što treba činiti i kako ga činiti. Narodi koji marljivo rade i koji usvoje više znanja i to znanje uključe u životne tokove – idu ispred drugih. To se posebno odnosi na znanja i umijeća aktuelnog vremena, o čemu smo dužni voditi računa. Ovladavanje tim znanjima i umijećima kolektivna je obaveza muslimana. Oni ovu obavezu moraju realizirati putem države i nad njom danonoćno bdjeti.

U nastojanju da probudi svijest kod svojih sljedbenika o znanju Vjerovjesnik, a.s., rekao je: „Prednost učenjaka nad pobožnjakom (koji nije učen) poput je prednosti Mjeseca u noći uštapa nad ostalim zvijezdama. Učenjaci su nasljednici vjerovjesnika, a vjerovjesnici iza sebe nisu ostavili nasljedstvo u dinarima i dirhemima, već znanje. Ko se njega bude držao opredijelio se za veliku vrijednost!“

Učen čovjek osvjetljava put pobožnjaku i ljudima ukazuje na opasnosti koje ih vrebaju i koje bi im mogle prouzročiti veliku štetu, budući da razumiju stvarnost bolje od drugih. „Jedan poznavalac propisa je za šejtana gori od hiljadu pobožnjaka“, rekao je Vjerovjesnik, a.s. Jer, poznavalac propisa ne samo da poznaje propis kao takav, već zna i kakve posljedice mogu nastupiti nepoštivanjem tih propisa, dok neuk pobožnjak može lahko biti obmanut.

Čovjek je u početku potpuno neuk, a potom počinje stjecati znanja: *Allah vas iz utroba majki vaših izvodi, vi ništa ne znate, i daje vam sluh, vid i razum!* (En-Nahl, 78). Tako čovjek postupno uči. Njegova znanja se sve više produbljuju i proširuju, a krajnji domet znanja je bogobojaznost, strah od postupanja suprotno načelima na kojima je On uspostavio ovaj svijet.

Nije poznato da je Poslanik, a.s., od Boga iskao da mu dadne ičega više od onog što je imao, osim znanja. Kada je objavljen ajet: *I reci: „Gospodaru moj, povećaj mi znanje!“* (Tā-Hā, 114), Poslanik je, molio: „Bože moj, poduči me onom što će mi koristiti i daj mi korist od onog čemu si me podučio, i povećaj mi znanje!“

Živimo u vremenu svakodnevnih smutnji i obmana. Dužnost je učenih ljudi da se više angažiraju u borbi protiv njihove dominacije. Pozivam ih da to učine, da ljudima razgrću te tmine i da ih upućuju dobru. Znanje i obrazovanje neće vršiti svoju ulogu ukoliko učeni ljudi nisu uključeni u društvena događanja. Učenjaci neće vršiti svoju zadaću ukoliko nisu angažirani u društvu. Musliman je onaj koji drži ravnotežu (el-mizan) u svemu, pa i u sticanju znanja. On je onaj koji vjeruje u dva svijeta: alemul-gajbi veš-šehade, onaj još uvijek nepoznat i ovaj poznati svijet, koji nas okružuje. Put do svijeta nepoznatog vodi nas preko ovog svijeta kojeg moramo upoznati, a to je moguće samo naukom. (...)

Nažalost, ova priča ima i svoj nastavak. Mnoga od djece, koja su svojim trudom stekla znanje, odlaze iz zemlje. Domovini je uskraćeno njihovo znanje. U narednom periodu jedan od prioritarnih zadataka treba nam biti da ovome stanemo ukraj, da korupciji u obrazovanju stanemo ukraj, da našu djecu zadržimo ovdje. Molim Allaha, dž.š., da našoj djeci poveća ljubav za znanjem i bogobojaznošću. Neka ih meleki nose na svojim krilima.

Neka Uzvišeni Allah svima nam otvori puteve prema tome. Amin!

KURBAN BAJRAM 2022. g. /1443. h. g.

Seminar za imame održan u četvrtak – 07.07.2022. godine u velikoj sali Medžlisa na kome su imami upoznati sa programom obilježavanja Kurban-bajrama, **Upoznavanje džematlija o aktivnostima na području Medžlisa i postupanju sa kurbanskim mesom i kožicama** – u petak 08.07.2022. na hutbi u vrijeme džuma-namaza i u subotu 1. dan Bajrama (09. 07. 2022.) na hutbi.

Bajram-namaz - klanjan u svim džamijama 09. 07. 2022. Ezan za sabah u 4,30 sati. Vrijeme između sabaha i Bajram-namaza iskorišteno za učenje Jasina za šehide i vakife i prigodno predavanje džematskih imama. Bajram namaz je klanjan u 5,50 sati uz bajramsku poruku glavnog imama.

Centralna bajramska svečanost održana u Čaršidžamiji gdje je Bajram-namaz klanjao i hutbu održao glavni imam mr. Fuad-ef. Omerbašić.

Bajramska sergija – u svim džematima poslije bajram-namaza postavljena sergija za potrebe Vjersko-prosvjetne djelatnosti Medžlisa IZ-e Tešanj i sva prikupljena sredstva predana u blagajnu Medžlisa IZ-e Tešanj, a na blagajni Medžlisa izdvojeno 25% za potrebe džemata.

Prikupljanje kurbanskog mesa za rehabilitacioni centar Duje, meso prikupljano sa područja cijelog Medžlisa IZ-e Tešanj u transportne hladnjače (koje je bez naknade ustupila firma „Madi“ Tešanj), kod Kutahya džamije na Krndiji prvi i drugi dan Bajrama do podne namaza i prevezeno do rehabilitacionog centra Duje. Prikupljeno i uredno predano oko 35 tona mesa (najviše do sada – 12. godina za redom).



Pripremljene hladnjače za prikupljanje kurbanskog mesa



Skladištenje kurbanskog mesa u hladnjači u centru Duje

Uplate kurbana za potrebe medresa - putem hutbi upoznate džematlije o mogućnosti uplate kurbana za potrebe medresa po cijeni od 390,00 KM i sve uplate na vrijeme prosljeđene medresama i to ukupno 468 kurbana (42 manje od prošle godine) od čega za medresu u Travniku 100, u Tuzli 105, u Mostaru 50, u Sarajevu 50, u Visokom 98 i u Banja Luci 65.

Kurbanske kožice – Prikupljene i distribuirane u skladu sa upustvom Rijaseta IZ u BiH prva dva dana bajrama. U džematima angažovana lica na prijemu i evidentiranju kožica, a prevoz iz džemata do skladišta Koteksa izvršen kamionima angažovanim od Medžlisa IZ-e Tešanj uz angažman ljudi za utovar i prijem u Koteksu.

Ovčije kožica zajedno sa ostalim otpadom ukopane i zbrinute prema sanitarnim propisima i navedenim Uputstvom Rijaseta na sanitarnoj deponiji u saradnji sa Općinom i JP „Rad“ Tešanj.

Prema raspoloživim podacima o kožicama i uplatama kurbana za medrese možemo konstatovati da je na području Medžlisa prineseno ukupno 6.419 kurbana (što je više za 356 od prošle godine).



Primjer uredno složenih kurbanskih kožica u džematu Mrkotić-Putešić

Program Mreže mladih „Da se nikad ne zaboravi“ (Fatiha, polaganje cvijeca na spomenik šehidima, performans) održan 11. 07. 2022. godine ispred šehidskog spomen obilježja kod Centra za kulturu u Tešnju u povodu Dana sjećanja na žrtve genocida u Srebrenici kome su se pridružili: Medžlis IZ-e Tešanj, Općina Tešanj, Crveni križ, Izviđači, KUD-a Izudin Mulabecorović Izo“, „Jelah“, „Pobjeda“, „Behar“ Tešanjka, „Ljiljan-Krin“ Kalošević, Odjel za brak i porodicu Medžlisa IZ-e Tešanj, Oslonac, Udruženje žena Jelašanke i Udruženje mladih ForTe.



OBILJEŽENA HIDŽRA - NOVA 1444. h. g.

Prema kalendaru Rijasetu IZ-e u BiH 1. muharrem 1444. je bio u subotu, 30.07.2022. godine. Na području Medžlisa IZ-e Tešanj Hidžra - Nova 1444.h.g. obilježena je u svim džematima prigodnim programima, izdajamo:

Medžlis, održana promocija knjige, prvog BH putopisa "Putem svile" u četvrtak, 28.07. 2022. godine u prepunom atriju Medžlisa IZ-e Tešanj prije akšam-namaza, čime je i simbolično započelo obilježavanje ovogodišnje Hidžre, odnosno nastupanje Nove 1444.h.g. O knjizi su govorili i video slajd sa putovanja komentirali autori: Hamza Ridžal i Edib Kadić i promotor Muhamed Ljevaković, a autore predstavio i program moderirao glavni imam mr. Fuad-ef. Omerbašić.



Miljanovci – Tradicionalni Mevlud kao centralna manifestacija Medžlisa proučen je u džamiji na Plaučku poslije akšam-namaza, 30.07.2022. (01.01.1444.h.g.). Program se sastojao od učenja Kur'ana, Mevluda, ilahija, dove i prigodnih obraćanja, a izveli su ga imami Medžlisa IZ-e Tešanj. Dobrodošlicu i zahvalu za prisustvo izrazio je džematski imam Raif-ef. Hasak prof., a prigodna predavanja o Hidžri - fadiletima, poukama i porukama održali su dr. Senad-ef. Čeman, profesor na FIN-a u Sarajevu i glavni imam mr. Fuad-ef. Omerbašić.



Čarši-džamija, Mevlud u subotu, 30.07.2022. prije akšam-namaza su proučili imami gradskih i prigradskih džemata, a prigodno obraćanje održali džematski imam mr. Enver-ef. Kurtić i glavni imam mr. Fuad-ef. Omerbašić.



Novi Miljanovci, Mevlud u subotu, 30.07.2022. poslije akšam-namaza su proučili polaznici mektepske pouke, a prigodno obraćanje održali džematski imam Bersad-ef. Kozlić prof. i glavni imam.



Dolac-Kotlanice, tradicionalni 53. Melud na bašči u nedjelju, 31.07.2022. poslije podne-namaza proučili imami Medžlisa IZ-e Tešanj, uz prigodna obraćanja džematskog imama Džafer-ef. Alispahića prof., gosta mr. Ejub-ef. Jašića i glavnog imama. Ovo je ujedno bio centralni program džemata u povodu jubileja 60 godina otvorenja mekteba u Dolcu i 23. godine džemata Dolac-Kotlanice.



Jelah, Mevlud u nedjelju, 31.07.2022. poslije akšam namaza proučili polaznici mektepske pouke, a prisutnim džematlijama su se prigodno obratili džematski imam hafiz mr. Almir-ef. Hadžić i glavni imam.



Jevmu-l-ašura, program održan u nedjelju 07.08.2022., 30. godinu za redom u Avdipašinoj džamiji poslije akšam-namaza. Zikr predvodio hadži Osman Jašić, a prisutne selamili i prigodno se obratili hafiz mr. Almir-ef. Salkanović i izaslanik glavnog imama mr. Enver-ef. Kurtić. Podijeljena ašura.



Jevadžije, Večer Ku'ana, održana u nedjelju, 28.08.2022. poslije akšam namaza. Kur'an su učili: hafiz mr. Nermin ef. Ibrahimović, hafiz mr. Almir ef. Hadžić, hafiz mr. Almir ef. Salkanović, hafiz Hidajet Talić, Muris ef. Braćkan i domaćin hafiz Anes ef. Mulić, a ilahije hor Medžlisa IZ-e Tešanj. Prisutnima su se prigodno obratili džematski imam hafiz Anes ef. Mulić i glavni imam.



POČELA NOVA MEKTEPSKA 2022/23. GODINA

Na temelju Odluke Rijaseta IZ-e u BiH od 28.07.2020. mektebska pouka se izvodi prema novom Nastavnom planu i programu, novim ilmhilima i novoj mektebskoj pedagoškoj dokumentaciji.

U cilju što kvalitetnije pripreme glavni imam je pred početak mektepske godine održao radne sastanke sa muallimima odvojeno po grupama u više termina.



Prema kalendaru Rijaseta IZ-e u BiH nova mektebska godina počela je u subotu, 10.09.2022. godine u svim mektebima upisom polaznika, a već u nedjelju 11.09.2022. održani su prvi radni časovi u mektebima.

Na slici u mektebu Novo Selo - 11. 09. 2022.



JUBILEJI

Dobropolje-Mekiš, 17.07.2022.- Jubilej 30 godina džemata, Mevlud – Centralna svečanost u povodu jubileja 30 godina džemata održana u džamiji poslije podne-namaza. U toku svečanosti Mevlud su proučili imami Medžlisa IZ-e Tešanj, zikr članovi Nakšibendijske tekije iz Tešnja na čelu sa vekilom hadži Osmanom Jašićem, a prisutnima se prigodno obratili džematski imam Suljo-ef. Djedović, glavni imam i gost vaiz hafiz mr. Ammar-ef. Bašić.

Na kraju je predsjednik džematskog odbora hadži Nusret Muharembegović uručio zahvalnice najzaslužnijima za doprinos u radu i afirmaciji džemata i to: ranijoj trojici predsjednika džematskog odbora - hadži Hasan Halilović, hadži Ibrahim Brka i hadži Fehim Softić, dugogodišnjem imamu hadži Hasan-ef. Haliloviću (sada u penziji) i najistaknutijem vakifu hadži Muharemu Sejdiću.

Prva džuma u ovom džematu organizirana je u starom mektebu 17.07.1992. godine koju je imao sada rahmetli Osman-ef. Halilović, nakon čega kreće inicijativa za formiranje džemata.



Džemilic Planje, 14.08.2022., Jubilej – 50 godina džamije - Tradicionalni mevlud i dova za šehide, proučen u nedjelju 14.08.2022.godine poslije podne-namaza, kojim je obilježen i jubilej 50 godina džamije. Mevlud su proučili imami Medžlisa IZ-e Tešanj, a prisutnima se prigodno obratili džematski imam (podsjetio na historijat džemata i džamije) i glavni imam. U toku programa uručene su vakufname vakifima: Žilić Fahrudin, pred dušu r. Halilović Zaima, Žilić Fahrudin, pred dušu r. Halilović Redže, Karamović Redžo, pred dušu oca hadži Mumina, Kćerke: Mejra, Zehmira i Haša, pred dušu oca Piro Nazifa, Kćerke: Mejra, Zehmira i Haša, pred dušu majke Piro Zumre, Kokić Safet i Saliha, Žilić Unka, Hazim, Samir i Satka, Turkeš Rasim i Habiba, Turkeš hadži Seid i Ostrvica hadži Fadila, te priznanja zaslužnima: Piro Mustafi, Turkeš Mesudu, Turkeš Mustafi (raniji predsjednici dž.o.), Hamdi-ef. Karamoviću (posthumno) i Rami-ef. Haliloviću (raniji imami), te Eminu Piri (istaknuti vakif).

Prva džamija u ovom džematu izgrađena je i svečano otvorena 18.08.1972.



Novi Miljanovci – 27.08.2022. Koncertom Armina Muzaferije na trgu ispred džamije završen program obilježavanja jubileja 50. godina džemata.



Ilmija - Jubilej 110 godina Ilmije u BiH - obilježen svečanim programom u Sarajevu 27.09.2022. u prisustvu delegacije Medžlisa i Ilmije iz Tešnja uz uručenje priznanja penzionisanim članovima Ilmije u ovoj godini, iz Tešnja hadži Omeru Pobriću (vidi foto na 7. strani), te promocijom knjige „Radni stres kod bosanskohercegovačkih imama: stanje, uzroci i suočavanje“ u atriju Medžlisa IZ-e Tešanj 30.09.2022.

Promotori: autor hafiz dr. Aid-ef. Smajić, Muftija za Australiju Jasmin-ef. Bekrić i glavni imam, moderator predsjednik OO Ilmije Tešanj Suljo-ef. Djedović prof.



Događaji, iz naših džemata...**Kadrovske promjene:**

Omer Pobrić – 01.07.2022. dostojanstveno ispraćen u penziju.



Mirnes-ef. Alić – imam džemata Vukovo, na lični zahtjev potpisao ugovor o sporazumnom prekidu radnog odnosa zaključno sa 31.08.2022.

Aldin-ef. Mehmedović, imam džemata Šije Gornje Polje, na lični zahtjev potpisao ugovor o sporazumnom prekidu radnog odnosa zaključno sa 31.08.2022.

Muris-ef. Braćkan, imam džemata Mračaj-Potočani, na lični zahtjev potpisao ugovor o sporazumnom neplaćenom odsustvu.

Piljužići - 25.09.2022. poslije jacije-namaza u džamiji je održana svečanost dodjele svjedodžbi za svršenice zajedničke hatme za odrasle, uz prigodno predavanje. Hatmu su proučile: Solo Sabira, Solo Amira, Selman Amira, Selman Raisa, Kurdić Fazila, Stračević Fatima, Starčević Aida i Hrnjić Maida.

Medžlis – 15.07.2022. Veće duhovne muzike – Zejd Šoto – Održano u okviru općinske manifestacije „Ljeto u Tešnju“ poslije akšam namaza na Trgu Gazi Ferhad-bega u Tešnju.



Medžlis – 16.09.2022. Održana promocija projekta "Pod nebom vedre vjere - Islam i Evropa u iskustvu Bosne", kojeg realizira Uprava za obrazovanje i nauku Rijaseta IZ-e u BiH, a pod pokroviteljstvom reisu-l-ule dr. Husein-ef. Kavazovića.

Promotori bili su: dr. Dževad Hodžić, mr. Osman Lavić, mr. Mensura Mujkanović, mr. Seid Eminović, a na promociji su se obratili i muftija zenički hfz. dr. Mevludin-ef. Dizdarević i glavni imam Medžlisa IZ-e Tešanj mr. Fuad-ef. Omerbašić.



Medžlis – 01.07.2022. Posjeta delegacije MFS EMMAUS, **Doboj istok** - direktor Hamzalija Okanović, Elmedin Škrebo i Alen Hodžić. Tokom ove posjete direktor se zahvalio glavnom imamu mr. Fuad-ef. Omerbašiću i predsjedniku IO Zehrudinu Kruški na dosadašnjoj uspješnoj saradnji te uručio Priznanje Medžlisu IZ-e Tešanj za poseban doprinos i nesebičnu podršku humanitarnim projektima koje vodi EMMAUS, dok je Elmedin glavnom imamu uručio pisma zahvale sa fotografijama djece iz Burkine Faso koja je stipendirao ovaj Medžlis sredstvima zaposlenih.

Dogovorena je saradnja na ovogodišnjem prikupljanju kurbanskog mesa u Tešnju za potrebe prihvatnog centra Duje. Predsjednik Aktiva vjeroučitelja iz Tešnja Muhamed Balić uručio je delegaciji novčanu pomoć koju su prikupili tešanjski vjeroučitelji od svojih sredstava.



Novo Selo – 18.09.2022. proučen tradicionalni 18. mevlud i hatma dova za šehide poslije podne-namaza. Mevlud su učili imami Medžlisa IZ-e Tešanj, a prisutnim se prigodno obratili džematski imam Sakib-ef. Alibegović, prof., glavni imam i hafiz mr. Ammar-ef Bašić.



Obilježen Dan sjećanja u Šijama 17. 07. 2022. Zajedničkom organizacijom tri džemata: Šije, Šije Donje Polje i Šije Gornje Polje, Mjesne zajednice Šije i udruženja građana „Ponikva“ U okviru bogatog programa imami iz Tešnja i Kaknja poslije akšam namaza u fiskulturnoj dvorani OŠ proučili su Mevlud u okviru koga su se u ime domaćina i organizatora prisutnim džematlijama obratio predsjednik savjeta MZ Šije Jasmin Čajić i dr. Rifat Sejdinović, a nakon njih Općinski načelnik mr. Suad Huskić. Prigodno predavanje, kao i glavnu poruku skupa, održali su i uputili Muftija zenički hafiz dr. Mevludin ef. Dizdarević i glavni imam mr. Fuad-ef. Omerbašić.



INFRASTRUKTURA

Čarši-džamija- 29.09.2022. – Započeli radovi na oslikavanju kupola džamije i nastavljeno zidanje munare iznad šerefice.



Medakovo – 28.09.2022. Rekonstruisan krov i unutrašnjost džamije, postavljena nova prostirka, u toku sanacija munare.



Miljanovci – 27. 09 2022. Kupljeno i uvakufljeno zemljište „Jezero“ zvano mezarje „Čemani“, ograđeno i uređen parking.



Kalošević – Renovirana i proširena vakufska kuća. Na džamiji stiropol fasada, podno grijanje i unutrašnje uređenje.



Avdpašina džamija – 29. 09. 2022. U toku je završetak izrade kamene ograde ulazne strane harema džamije.



Oraš Planje – 30.09.2022. U toku su završni radovi na izgradnji novog mesdžida Huskići.

